

庚戌日暈

辛亥日出時日上赤氣直立如一匹布許良久乃滅

壬子未時太白見於地

癸丑辰時有氣若霧若塵蒙冒南方西方漸移北方東方已時消散○慶尚道慶州地震屋宇微動暫時而止

史臣曰地道宜寧而至於震動變異孰甚焉非但此一州慶尚一道大槩皆震視他道特甚天意安在可不懼哉

甲寅太白見於地

乙卯慶尚道救荒敬差官李友閔狀啓略曰自秋徂冬不雨無雪兩麥枯損百萬生靈末由救活坐視其死極為寒心移粟賑救不可不速傳曰令該曹急速措置○上御夜對○日出時日上有赤氣如一匹布許須臾而滅夜月微暈兩珥南方如雷聲一度

丁巳夜東方南方如火氣

戊午下書于全羅道觀察使俞絳慶尚道觀察使權轍曰聞本